

## Korinto I

### *Fisalamañe*

<sup>1</sup> I Paoly, kinanjy ho Firàhe' IESOÀ Norizañey ami'ty satrin' arofon' Añahare, naho i Sostena rahalahy. <sup>2</sup> Ho ami'ty Fivorin' Añahare e Korinto aña, ho amo nampiavahe' IESOÀ Norizañeio, o kinanjy ho noro'eo, miharo amy ze hene mpikanjy ty tahina' IESOÀ Talèntika Norizañey ndra aia aia, i TALE' iareo naho antikañey. <sup>3</sup> Hasoa ama' areo naho fañanitsiñe boak' aman' Añahare Raen-tika naho IESOÀ TALE' Norizañey.

### *Fañandriañañe*

<sup>4</sup> Andriañeko nainai'e t'i Andrianañahareko ty ama' areo, ty hasoan' Añahare natolotse anahareo am' IESOÀ Norizañey, <sup>5</sup> ie ama'e ro niaboeñe amy ze lafi'e iaby an-tsara heneke naho an-kihitse fonitse, <sup>6</sup> ie niventèñe ama' areo ty fitaroñañe i Norizañey. <sup>7</sup> Aa le tsy eo ty tsy eneñe ama'areo amo falalàñe iabio, hene rototse mitamà ty fiboaha' i Talèntika IESOÀ Norizañey. <sup>8</sup> Ie ty hampijadoñe anahareo sikal' am-pigadoña'e aña, tsy hanan-kila amy andro' i Talèntika IESOÀ Norizañey. <sup>9</sup> Migahiñe t'i Andrianañahare nikanjy anahareo ho amy fifampilon-goañe amy Ana'e, Talèntika IESOÀ Norizañey.

### *Mifañambake am-Pivory ao*

<sup>10</sup> Ie amy zao, mañosike anahareo raho ry longo, amy tahina' i Talèntika IESOÀ Norizañey, ty hiharo saontsy, tsy hifampiriaria, f'ie ho

fonireñe ho raike an-kilala naho raike an-tsafiry. <sup>11</sup> O ry longo, fa natalili' o mpiamy Kloaio amako t'ie amam-pifandierañe; <sup>12</sup> ty anoako zao, le te ao ty manao ty hoe: mpiamy Paoly raho, le ty raike: amy Apolosy raho, naho ty raike: amy Kefasy raho, vaho ty ila'e: zaho amy Norizañey. <sup>13</sup> Aa vaho mitsiriaria hao i Norizañey? Pinèke ho anahareo hao t'i Paoly? He nalipotse ami'ty añara' i Paoly? <sup>14</sup> Andriañeko t'i Andrianañahare te tsy ia ama' areo ty nalipoko naho tsy i Krispo naho i Gaio avao, <sup>15</sup> ke eo ty hanao ty hoe t'ie nilipotse ami'ty añarako. <sup>16</sup> (Toe nalipoko ka o añ'anjomba' i Stefanasio. Fa tsy apotako ze ila'e mete ho nampiliporeko.) <sup>17</sup> Toe tsy nañitrik' ahy handipotse i Norizañey, fa ty hitaroñe i talili-soay, tsy an-dreha-kante kera hampikoahene i hatae' ajale' i Norizañey.

*ty Hihin' Añahare naho ty Haozara'e*

<sup>18</sup> Toe borosode amo mikoromakeo ty tsara' i hatae' ajaley, fe haozaran' Añahare amantika rombaheñeo. <sup>19</sup> Fa hoe ty pinatetse: Ho rotsaheko ty hihi' o mahihitseo, naho hakafitse ty hilala' o mahilalao.\*

<sup>20</sup> Aia ze o mahihitse zao? Aia ty mahay taratasy? Aia ty mpionim-piheotse ami'ty sa' toy? Tsy nanoen' Añahare hanèñe hao ty hilala' ty tane toy? <sup>21</sup> Ie amy hihin' Añaharey, kanao tsy nampahafohiñe an' Andrianañahare ty hihi' ty tane toy, le nisatrien' Añahare ty handrombake ze mahafiantoke ami'ty hagegea'

\* **1:19** Ies 29:14; Oni Mat 11:25, Rom 1:22

i tsara taroñeñey. <sup>22</sup> Toe mipay viloñe o Jiosio, naho mitsoe-kihitse o Grikao; <sup>23</sup> fe mitaroñe i Norizañe pinèkey zahay: ie boloko fitsikapia' o Jiosio, naho hadagolàñe amo Grikao; <sup>24</sup> fe amo kinanjio, he te Jiosy ke Grika, le ie ty haozaran' Añahare naho ty hihin' Añahare.

<sup>25</sup> Fa mahihitse te am'ondatio ty hagegean' Añahare, naho maozatse te am'ondatio ty haifoifoan' Añahare. <sup>26</sup> Haraharao i nikanjiañe anahareoy: tsy nimaro ty nahihitse amo nofo-tseo, tsy nimaro ty fanalolahy, tsy niampeampe ty ana-donake. <sup>27</sup> Fe jinobon' Añahare o gege antane atoio hanalatse o mahilalao, naho jinobon' Añahare o maifoifo' ty tane toio hañameñatse o jomakeo; <sup>28</sup> jinobon' Añahare o tsy vara' ty tane toio naho o mavoiñeo vaho o atao tsy vente'eo, hampikoaha'e o raha eoo, <sup>29</sup> soa te tsy eo ty nofotse hirengevoke añañatrefan' Añahare. <sup>30</sup> Ie ro maha am' IESOÀ Norizañey anahareo, Ie ty nanoan' Añahare hihitse naho havantañañe naho fiavahañe vaho fijebañañe an-tika, <sup>31</sup> soa te, amy pinatetse ty hoe:

Ze mirenge, Ee te i TALÈ ro firengea'e†.

## 2

<sup>1</sup> O ry longo, ie nivotrake ama' areo raho, le tsy an-dàn-tsaontsy, tsy an-kihitse ty nitaroñako i nietak' aman' Añaharey. <sup>2</sup> Fa nifaharako te tsy hahafohiñe ndra inoñ' inoñe ama' areo ao naho tsy IESOÀ Norizañey vaho ie pinèke. <sup>3</sup> Nimokotse t'ie tama' areo, nihembañe, vaho nisilofe' ty

---

† 1:31 Iir 9:23-24

nevenevetse. <sup>4</sup> Le tsy an-tsaontsin-kihitse mahas-intoñe i rehakoy naho i fitaroñakoy, fa ami'ty fampalangesañe i Arofoy naho añ-ozatse, <sup>5</sup> soa tsy hioreñe ami'ty hakante' ondaty ty fatokisa' areo fa ami'ty faozaran' Añahare.

### *Hihitse amy Arofoy*

<sup>6</sup> Toe mitaroñe hihitse amo àñoño eo zahay, fa tsy ty hihi' ty sa toy, ndra ty a o mpifehe' an-tsa toio, ie sindre miha-modo. <sup>7</sup> Toe mitaroñe i hihin' Añahare nakafitsey zahay, i hihitse naetake pak' henaney, f'ie norizan' Añahare taolo' ty sa toy hañonjona'e antika, <sup>8</sup> ie ninofi' o mpifehe an-tsa toio, fa naho nifohi' iareo, le tsy ho pinè' iareo i Talèn' engeñey. <sup>9</sup> Fa hoe ty pinatetse:

Fihaino tsy nahaisake,  
ravembia tsy nahajanjiñe,  
vaho tsy nizilike añ' arofo'ondaty  
ze he'e hinalankan' Añahare  
ho a' o mikoko azeoo.\*

<sup>10</sup> F'ie nibentabentaren' Añahare aman-tikañe añamy Arofo'ey, fa mitsoeke ze he'e i Arofoy, naho o raha miheotse aman' Añahareo. <sup>11</sup> Aa vaho ia am'ondatio ty mahafohiñe ze mitoloñe amy t'indaty ao naho tsy ty arofo am'indatiy? Manahake zay, tsy fohi' ondaty ty faharofoanan' Añahare naho tsy i Arofon' Añaharey.

<sup>12</sup> Ie amy zay, tsy ty fañahi' ty tane toy ty rinamben-tika, fa i Arofo boak' aman' Añaharey, soa te ho fohintika o raha natolon' Añahare antika am-patariha'eo, <sup>13</sup> ie o taroñe'aio, tsy an-tsaontsy nanare' ty hihi' ondaty fa amo naò' i

---

\* 2:9 Ies 64:3

Arofo Masiñeio, ie mampidodea o rahan' Arofoo amo aman' Arofoo. <sup>14</sup> Toe tsy maharambe o rahan' Arofon' Añahareo ty fañereñerea' ondatio, fa hagegeañe ama'e, tsy eo ty hahafohina'e, amy t'ie rendreke an'arofa. <sup>15</sup> Mitsikaritse ze he'e ty aman'arofa, fe tsy leo ty ila'e tsikariteñe. <sup>16</sup> Aa vaho:

Ia ty mahafohiñe ty faharofaana' IEHOVA hañòke aze.†

Toe aman-tika ty fitsakorea' i Norizañey.

### 3

#### *Ty Firiariañe am-Pivory ao*

<sup>1</sup> O ry longo, tsy mahafirehake ama' areo raho hoe amo aman' arofoo, fa hoe amo ama' nofotseo; hoe ajaja kede amy Norizañey. <sup>2</sup> Nampikamaeko ronono fa tsy hena; amy t'ie mboe tsy nahaleo naho mboe tsy mahaleo avao. <sup>3</sup> Toe mbe amy nofotsey nahareo, ie zoeñe ama' areo ty tsikirike naho ty lietse; aa tsy hatao t'ie amy nofotsey hao, ie hoe ondaty tsootra ty fañaveloa' areo? <sup>4</sup> Kanao eo ty manao ty hoe: Mpiamy Paoly raho, naho ty ila'e: Amy Apolosy raho; aa vaho tsy t'ie manahake ondatio avao hao? <sup>5</sup> Ia arè t'i Apolosy? Ia ka t'i Paoly? naho tsy mpitoroñe nampiato anahareo, ie sambe nitolora' i TALÈ. <sup>6</sup> Nitongy raho, nanondrake t'i Apolosy, fa i Andrianañahare ty nampitombo. <sup>7</sup> Aa le sindre ts'inoñe i mpitongiy naho i mpanondrakey, fa i Andrianañahare ty mpampitombo. <sup>8</sup> Lia'e raike ty mpitongy naho

---

† 2:16 Ies 40:13

ty mpanondrake, songa handrambe ty tambe'e mañeva i fitromaha'ey. <sup>9</sup> Mpifanehake aman' Añahare zahay; teten' Añahare nahareo, fan-dranjian' Añahare.

<sup>10</sup> Ty amy falalàn' Añahare natolotse ahikoy, le hoe talèm-pandranjy ty nandaharako i man-anta'ey, le mamboatse ama'e ty ila'e. Aa soa re te sindre mitomitse amy ty hanovoña'ey t'indaty.

<sup>11</sup> Fa tsy eo ty mahafañoreñe manantañe ila' i tafa-oreñey, i IESOÀ Norizañey. <sup>12</sup> Aa naho eo ty handranjy amy manantañey, ami'ty volamena, volafoty, vatosoa, hatae, ahetsy, ndra setra, <sup>13</sup> songa hidodea ty sata' ondaty, fa haboa' i androy, amy te ho bentareñe ami'ty afo, vaho i afoy ty hitsoke ty hasoa-sata' ondaty. <sup>14</sup> Ie mahatàñe ty nandranjia' ondaty amy manantañey, le ho tambezeñe. <sup>15</sup> Ie teno ty sata' ondaty le fiando ama'e. Toe ho rombahen-dre, fe hoe nitoañe afo. <sup>16</sup> Tsy fohi' areo hao t'ie kivohon' Añahare, toe imoneña' i Arofon' Añaharey? <sup>17</sup> Ie rotsahe' ondaty ty kivohon' Añahare, le ho mongoren' Añahare, fa miavake i kivohon' Añaharey; inahareo 'nio.

<sup>18</sup> Asoao tsy hamañahy vatañe. Naho ama'areo ty mihaboke hihitse ami'ty sa toy, soa re te hireke ho bahimo, hiha-hihitse. <sup>19</sup> Amy te hadagolañ' aman' Añahare ty hihi' ty tane toy. Fa hoe ty pinatetse:

Tsepaha'e ami'ty hakante'e ty mahilala\*

<sup>20</sup> tovo'e:

Arofoana' i TALE ty fitsakorea'

---

\* **3:19** Iob 5:13

o mahihitseo, te tsy vente'e.†

<sup>21</sup> Asoao tsy ondaty ty hisengeañe, amy te fanaña' areo ze he'e; <sup>22</sup> Ke i Paoly, he i Apolosy, ke i Kefasy, he ty voatse toy, ke ty haveloñe, he ty havilasy, ke o eoo, hera o ho avio; hene anahareo; <sup>23</sup> a i Norizañey nahareo vaho aman' Añahare i Norizañey.

## 4

### *Firàhe'i Norizañey*

<sup>1</sup> Ee te zao ty hatao' ondaty, te mpitoro' i Norizañey zahay, mpamandroñe o raha mi-etake aman' Añahareo. <sup>2</sup> Mbore paiaeñe amo mpamandroño t'ie ho zoeñe migahiñe. <sup>3</sup> Tsy loho vente'e amako ty fibiribiria' areo naho ty fañereñerea' ondatio; fa ndra zaho tsy mizaka ty vatako. <sup>4</sup> Toe tsy apotako te inoñe ty hanesehañe ahy, f'ie tsy mahahaha ahy, toe i TALÈ ro hizak' ahy. <sup>5</sup> Aa le ko mizaka aolo' ty andro'e, ampara' ty fitotsaha' i TALÈ, Ie ty hampalange o raha mietake an-kamoromoroñaño naho ho bentabentare'e o fisafirin' arofoo; zay vaho songa ho toloran' Añahare ty engeñe mañeva. <sup>6</sup> I tsaraeñey ry longo, le fa nirazañeko ami'ty vatako naho i Apolosy ty ama' areo, soa t'ie hioke ama'ay te tsy andikoareñe o sinokitseo tsy mone hibohabohañe ty raike naho injeñe ty ila'e. <sup>7</sup> Aa vaho ia ty nampitoabotse anahareo? Inoñe ama' areo ty tsy rinambe' areo? Aa naho toe nandrambe le inoñe ty irengea' areo hoe tsy nandrambe?

---

† 3:20 Sab 94:11

<sup>8</sup> Fe eneñe nahareo! Toe mpañaleale! Fa mpanjaka ndra te tsy eo zahay! Eka, ho nirieko t'ie nimpanjaka, hitraofa'ay fifeheañe!  
<sup>9</sup> Ataoko te napon' Añahare amboli'e zahay Firàheñe ho sambaeñe, hoe nafàtse havetrake; amy t'ie nanoen-ko fisambà' ty voatse toy naho o anjelio vaho ondatio. <sup>10</sup> Seretse zahay ty amy Norizañey, fe mahihitse amy Norizañey nahareo! Maleme zahay fe maozatse nahareo! Asiñeñe nahareo, vaho mavoeñe zahay!  
<sup>11</sup> Ampara' ty ora toy, le mifeake naho miheahea zahay, rota, finofopofoke, vaho tsy aman' akiba. <sup>12</sup> Mifanehake, mitoloñe amo taña'aio; ie onjireñe, itatà'ay; ie samporerahene, ifeaha'ay; <sup>13</sup> ie terateraeñe, imanea'ay taroñe. Natao ho leotse ami'ty voatse toy zahay, forompo' ze he'e pak' henane.

<sup>14</sup> Tsy nisokirako hanalatse anahareo 'nio, fa t'ie ho vereñe hoe anak' isoko. <sup>15</sup> Aa ndra te ale-ale ty mpañana' areo amy Norizañey, tsy maro ty rae' areo; fa zaho ty nampiareñe anahareo am' IESOÀ Norizañey amy talili-soay. <sup>16</sup> Aa le osiheko t'ie hihambañe amako. <sup>17</sup> Zay ty nañitrifako i Timoty anake kokoako naho migahiñe amy TALÈ; ie ty haniahy anahareo o satako amy Norizañeio, manahake ty fañòhako mbeombeo amo hene Fivorio.

<sup>18</sup> Akore te ao ty mirengevoke hoe te tsy ho pok' ama' areo raho. <sup>19</sup> F'ie ho avy aniany naho satri' i TALÈ, le tsy ho rendreko ty enta' o mpitoabotseo fa ty haozara'e. <sup>20</sup> Tsy saontsy i Fifehean' Añaharey, fa ozatse. <sup>21</sup> Inoñe arè



ty satri' areo? Hinday doda hao t'ie pok'eo, ke fikokoañe naho hamoràn-troke?

## 5

### *Anò Añombelahimavo*

<sup>1</sup> Fa miboele te ama' areo ty fifampirañaotañe, toe hakarapiloañe tsy amo kilakila' ndatio: te eo ty miharo-lamba amy valin-drae'ey! <sup>2</sup> Akore te iebotsebora' areo! tsy hamake ho nandala? soa te ho naitòañe i nanao zay. <sup>3</sup> Aa naho zaho, ndra te tsy eo am-batañe, le miatreke an-troke vaho fa zinakako i nanao zay, manahake t'ie eo. <sup>4</sup> Ie mivory amy tahina' IESOÀ Talèntikañey, le ama' areo an-troke raho, ami'ty haozara' IESOÀ Talèntikañey, <sup>5</sup> aa le aseseo amy mpañinjey indatiy handrotsahañe i haondati'e hambo'ey, soa te ho rombaheñe ami'ty andro' i TALÈ IESOÀ i arofo'ey.

<sup>6</sup> Tsy mete ty firoharohà' areo; tsy fohi' areo hao te mahatsitsike ty boko'e ty lalivay kede. <sup>7</sup> Kohezo soa o lalivay hambo'eo soa t'ie ho boko'e vao, manahake t'ie tsy aman-dalivay, fa nisoroñañe ho antika i Norizañey, i Fihelantikañey\* <sup>8</sup> Aa le antao hiambeñe i sabadidakey, tsy an-dalivay hambo'e, tsy an-dalivain-kalotserahañe naho haratiañe, fa ami'ty tsy aman-dalivai' i hatsò-troke naho hatòy.

<sup>9</sup> Nisokirako amy taratasikoy te tsy hitraodrehake amo manao hakarapiloañeo, <sup>10</sup> fe tsy t'ie ze fonga karapilo' an' tane atoy ndra ze

---

\* 5:7 Avo 12:3

mpihàñe naho mpikatramo ndra ze mpañori-pahasive, amy t'ie tsy mahay tsy ho niakatse an-tane atoy. <sup>11</sup> Fe nisokirako te tsy hitraofa'areo ty miantoñoñe ho longo, te mone mpandrañaotse ndra mpitsikirike, ndra mpitorom-pahasive, ndra mpañinje, ndra mpijike, ndra mpikatramo. Ko itraofam-pikama. <sup>12</sup> Inoñe ty izakako o alafe'eo? Tsy zaka'e' areo hao o ama' areo? <sup>13</sup> I Andrianañahare ty hizaka o alafe'eo, fe Aitò ama' areo i tsivokatsey.†

## 6

### *Ty Mpireketse Mifanisý*

<sup>1</sup> He ama' areo ao ty aman-kabò ami'ty ila'e, ho vani'e hao ty miatre-jaka aolo' o tsy vantaño, fa tsy añañtrefa' o noro'eo? <sup>2</sup> Ke tsy fohi' areo te hizaka ty voatse toy o noro'eo? Aa kano ho zaka'e' areo ty voatse toy, tsy fieva' areo hao ty hibiribiry ty sisý pilipito'e? <sup>3</sup> Tsy fohi' areo hao t'ie hizaka anjely? Somandrake o raha mioza ami'ty haveloñe toio? <sup>4</sup> Aa naho manan-ko zaka'eñe ami'ty haveloñe toy nahareo, hampizaka'e' areo hao ze kede amo Fivorio ao? <sup>5</sup> Ty hanalatse anahareo ty nanoako zay. To hao t'ie tsy ama' ondaty mahihitse, mahafizaka añaivo' o rolongoo? <sup>6</sup> Te mone maneseke rahalahy ty rahalahy, naho toe añañtrefa' o tsi-miatoo! <sup>7</sup> Aa le gioke nahareo, t'ie mifampiatrek' an-jaka. Tsy hamake anesehan-kakeo? Tsy ndra

† 5:13 Its 13:5, Oni Its 17:7,12; 19:19; 21:21; 22:21,24; 24:27

kitra'e nikatramoeñe? <sup>8</sup> Aiy! ndra inahareo ro mandilatse fa mamerevere longo!

<sup>9</sup> Ke amoea' areo te tsy handova i Fifehean' Añaharey o tsivokatseo. Asoao tsy ho fañahieñe: fa ke mpañarapilo, ke mpiamo fahasiveo, ke mpila vali' ondaty, ke mpisare ampela, ke mpila-faly, <sup>10</sup> ke mpampikametse, ke mpitsikirike, ke mpitrini-mena, ke mpiteratera, he mpikatramo, songa tsy handova i Fifehean' Añaharey\*. <sup>11</sup> Nanahake zay ty ila' areo. F'ie nampandroañe, navaheñe, vaho nampivantañeñe ami'ty tahina' i TALÈ IESOÀ Norizañey naho amy Arofon' Andrianañaharen-tikañey.

### *Hakarapiloañe*

<sup>12</sup> Sindre azoko anoeñe, fe tsy songa mahasoa. Hene azoko anoeñe, fe tsy meteko hondevozeñe. <sup>13</sup> Ty fisafoa ho ami'ty mahakama naho ty mahakama ho ami'ty fisafoa—fe ho rotsahen' Añahare ie roe. Tsy natao ho fiolorañe vilañe ty sandriñe, fa ho a i TALÈ, vaho i TALÈ ho a i fañòvay. <sup>14</sup> Natroan' Añahare i TALÈ vaho hatroa'e amy haozara'ey ka tika.

<sup>15</sup> Amoea' areo hao te fangefange amy fañova' i Norizañey o sandri' areoo? Aa vaho hangalako ho amy tsimirirañey hao o fangefange' i Norizañeio? Sondo'e zay! <sup>16</sup> Hera nofi' areo te ze mipiteke ami'ty tsimirirañe ro sandriñe raike ama'e? Fa hoe re: Ho nofotse raike i roroey.† <sup>17</sup> Le arofo raike ka ty mpipiteke amy TALÈ.

\* **6:10** Gal 5:19-21, Efe 5:3-5 † **6:16** Fot 2:24

<sup>18</sup> Ibotitsiho o firañaotañeo. Toe alafe'e ao ze fonga hakeo anoe' ondatio, fe mañakeo i sandri'ey ty mpañarapilo. <sup>19</sup> Ke tsy fohi' areo te kijà' i Arofo Masiñe mimoneñe ama' areo ao ty sandri' areoo, ie ama' areo boak' aman' Añahare? vaho tsy anahareo nahareo, <sup>20</sup> fa vinily sarotse; aa le rengeo an-tsandri' areo t'i Andrianañahare.

## 7

### *O Fanambaliañeo*

<sup>1</sup> Aa ty amo raha sinoki' areoo. Hàmake tsy hipaok' ampela ty lahilahy. <sup>2</sup> Fe ty amo hakarapiloañeo, soa re te songa hanañe ty vali'e ty lahilahy, naho sindre hanañe ty vali'e ty rakemba. <sup>3</sup> Le hañeneke ty lili'e amy vali'ey ty lahilahy, manahake zay ka ty rakemba amy tañanjomba'ey. <sup>4</sup> Tsy manandily amy sandri'ey ty rakemba, fa i vali'ey; naho tsy manandily amy sandri'ey ty lahilahy, fa i rakemba'ey. <sup>5</sup> Ko mifampifoneñe naho tsy ty amo andro ilahara' areo ho fitalahoañeo, aña zay le miolora tsy mone hazizi' i mpañinje y t'ie tsy maha-lie-bataña. <sup>6</sup> Fiheveaña o rehako zay, fa tsy lily. <sup>7</sup> Nikitrako te sindre nanahake ahiko ondatio. F'ie songa manañe ty falalàña natolon' Añahare aze; etia ty aman-tsata zao le eroa ty aman-tsata zay.

<sup>8</sup> Aa le hoe raho amo tsy amam-balio naho amo vantotseo; Soa ho a iareo ty himoneñe hambaña amako. <sup>9</sup> Fa naho tsy mahalie-bataña, le apoho hañenga valy. Hamake t'ie hanambaly ta te hiforehetse.

<sup>10</sup> Le hoe ty atoroko o manam-balio, toe tsy zaho fa i TALÈ, asoa tsy hisitake ami'ty vali'e ty rakemba. <sup>11</sup> (F'ie misitake, soa re te hidoñe tsy hanambaly, ke hifampirekets' amy vali'ey indraike.) Vaho tsy hañary ty vali'e ty lahilahy.

<sup>12</sup> Manao ty hoe amo ila'eo raho, fa tsy i TALÈ: Naho eo ty rahalahy amam-baly tsi-mpiato, fe no'e ty mipiteke amy lahilahy, le tsy haria'e.

<sup>13</sup> Naho amam-baly tsi-mpiato ty rakemba, ie mbe te hirekets' ama'e, le ehe tsy hampisitahe'e.

<sup>14</sup> Amy te hampiavahe' i rakembay i vali'e tsi-mpiatoy, vaho hampiavahe' i lahilahy i vali'e tsi-mpiatoy; naho tsy zay tsy ho nalio o ana' areoo, f'ie amy zao, miavake. <sup>15</sup> Aa naho te hifampiria' ty tsi-miato, le apoho hamb'eo, fa tsy mpirohy i rahalahy ndra i rahavavey; fe mikanjy antika hifampilongo t'i Andrianañahare. <sup>16</sup> Fa aia ty hahafohina'o, ry rakembao, ke ho rombahe'o ty vali'o? Le aia ty hahafohina'o, ry lahilahio, he ho rombahe'o ty tañanjomba'o? <sup>17</sup> fe soa re te songa mañavelo amy tinendre' i TALÈ azey, amy sindre nikanjian' Añahare azey, zay ty fanoroako amo Fivory iabio. <sup>18</sup> Nikanjiefie t'ie sinavatse hao? aa le tsy ho faohe'e i fisavara'ey; nikanjiefie t'ie tsy nisavatse hao? soa re te tsy ho savareñe. <sup>19</sup> Ts'inoñe o savatseo; ts'inoñe ka ty tsy fisavarañe; fa ty fañambenañe o lilin' Añahareo\*. <sup>20</sup> Aa le songa mijohañe amy nikanjiañe azey t'indaty. <sup>21</sup> Niondevo hao t'ie kinanjy? Ko ahoa'o; fe naho mete'o ty mihaha, le mihahà. <sup>22</sup> Le ty nikanjiefie amy TALÈ ao t'ie

---

\* **7:19** Rom 2:26,29

ni-ondevo ro haha amy TALÈ; le ty nikanjiañe t'ie midada ka, ro fetrek' oro i Norizañey†. <sup>23</sup> Vinyly sarotse nahareo, aa le ko miondevo ama' ondaty. <sup>24</sup> O ry longo, sambe mimoneña aman' Añahare amy nikanjiañe azey.

*Ty Somondra naho ty Vantotse*

<sup>25</sup> Aa ty amo somondrarao, tsy amako ty lili' i TALÈ; f'ie manolo-kevetse amy te niferenaiña' i TALÈ ho matoe. <sup>26</sup> Aa le ataoko te mahaso, ty amo faloviloviañe henaneo, te mijohañe amy azey avao t'indaty. <sup>27</sup> Ihe mirekets' aman-drakemba? ko mipay ho votsotse. Ihe mihaha an-drakemba, ko mangala-baly. <sup>28</sup> F'ie mañenga valy, tsy hakeo, lehe engaeñe ty somondrara, tsy aman-tahiñe, fe ho volevolèn-draha ami'ty haveloñe toy, ie ho nikalañako.

<sup>29</sup> Fe zao ty volako, ry longo: Tomotse o androo, aa ie henane zao, soa re te hanao hoe tsy manambaly o amam-balio, <sup>30</sup> naho hoe tsy miharovetse o mirovetseo, naho hoe tsy mirebeke o mirebekeo, naho hoe tsy mahazo o mivilio, <sup>31</sup> vaho hoe tsy mijorobo ami'ty haveloñe toy o mitoloñe ama'eo, fa mihelañe ty vinta' ty voatse toy. <sup>32</sup> Kitrako te tsy ni-tsimboetse nahareo. Midare o raha' i TALÈo ty tsy manambaly, hampiehake i TALÈ. <sup>33</sup> F'ie midare o raha' ty tane toio i manambaliy, ty hampinembanebañ' i vali'ey. <sup>34</sup> Miambake ka ty rakemba naho ty somondrara; dare' i tsy amam-baliy i Talè, ie te hiavake antsandry naho an-troke. Fe tsiborehetohe' o raha' ty tane toio i amam-baliy, ty hahafale i vali'ey.

---

† 7:22 Efe 6:6, Pe I 2:16

<sup>35</sup> Ty hahasoa anahareo ty nanoako zao, tsy t'ie hanao bozizy, fa ty hañonjonako ze mañeva, tsy hañembetse ty fiatraha' areo i TALÈ.

<sup>36</sup> Fa naho eo ty mitsakore te tsy mañeva i anak' ampela'ey i fanoe'ey, ie fa miha-àñoñe, naho atao'e te toko'e henefañe, le ee te hanoe'e i satri'ey, ie tsy aman-kakeo, apoho hengaeñe.

<sup>37</sup> Fe i migahiñe añ' arofo'ey, ie tsy embetse, midada amo azeo, naho fa nanampa-kevetse añ'arofa ao te ho tana'e i somondrara'ey, le manao soa. <sup>38</sup> Aa le manao soa i mampañenga i somondrara'ey, fa lombolombon-kasoa ty tsy mampañenga.

<sup>39</sup> Fehè' o lilio ty rakemba ie mbe veloñe ty vali'e; fe naho vilasy i vali'ey le votsotse re hanambaly ze tea'e amy TALÈ ao. <sup>40</sup> Ho soa tata t'ie nitoboake amy zao avao, hoe ty ereñereko, ie ataoko te amako ka i Arofon' Añaharey.

## 8

### *Mahakama Soroñeñe an-Kazomanga*

<sup>1</sup> Aa ty amo raha banabanaeñe amo hazomangaoo: ataon-tika te songa aman-kilala tika; mampiebotsebotse ty hilala, fe mampiraorao ty koko.

<sup>2</sup> Naho eo ty mieva t'ie mahafohin-draha, le mboe tsy ama'e ty hilala do'e. <sup>3</sup> Fe arofoanan' Añahare o mikoko azeo. <sup>4</sup> Aa ty amo fika-mañe raha nisoroñañe an-kazomangaoo, fohintika te tsitantane atoy ty samposampo, naho te Raike tsi-roe-tsi-telo t'i Andrianañahare. <sup>5</sup> Aa ndra te ao ze o ndrañahareo, ke andindiñe aña, he an-tane atoy (toe maro o 'ndrañahareo

mbore tsifotofoto o talèò), <sup>6</sup> fe aman-tika, raike t'i Andrianañahare, i Rae niboaha' ze he'e naho iveloman-tikañey; Raike ka i TALÈ IESOÀ Norizañey—ie ty nanoeñe ze kila raha, naho itika añama'ey. <sup>7</sup> Fe mboe tsy ama' ze hene ondaty i hilala zay. Ty ila'e, ie zatse i hazomangay am-para' henane, ro mikama hoe te binanabana an-kazomanga, vaho mahativa i arofo'ey i haleme'ey.

<sup>8</sup> Toe tsy fañarineañe aman' Añahare ty mahakama; le tsy mahafotsake t'ie tsy mikama, vaho tsy onjoñe'e te tsy mikama. <sup>9</sup> Fe mitaòà, kera ho vato mahatsikapy o maifoifoo ty fidadàn' arofo' areo. <sup>10</sup> Amy t'ie mahaisak' azo t'indaty, te ihe mahilala ro mikama an-toe' i hazomangay, le va'e mahaosike i tsy maozatse añ'arofoy ty hikama i haneñe binanabana amo raham-pahasiveoy. <sup>11</sup> Aa akore te hianto ty amy hilala'oy i longo'o maifoifo nivilasia' i Norizañey. <sup>12</sup> Aa ie mandilatse aman-drolongo ro mahafere i arofo'e malemey, le aman-tahiñe amy Norizañey. <sup>13</sup> Aa naho hampanan-kakeo i longokoy ty mahakama, le tsy hikama hena kitro katroke raho, tsy mone hamingan-dongo.

## 9

### *Ty Zo o Firaheñeo*

<sup>1</sup> Tsy midada hao raho? Tsy Firàheñe v'irahoo? Tsy fa nitreako hao t'IESOÀ Talèntika? Tsy satako amy TALÈ v'inahareo? <sup>2</sup> Aa ndra t'ie tsy Firàheñe ami'ty ila'e, toe izay ama' areo, ie tombo-kalama' ty maha-Firàhe' i TALÈ ahy.



<sup>3</sup> Inao ty fatoiko amo mandohy ahio: <sup>4</sup> Tsy aman-jo hihinañe naho hinoñe v'izahay? <sup>5</sup> Tsy zo'ay hao ty minday valy mpiato hindre lia ama'ay manahake o Firàheñe ila'eo, naho i rahalahi' i TALÈ rey vaho i Kefasy? <sup>6</sup> Ke zaho naho i Barnabasy avao ty tsy aman-jo hitroatse amy fitoloña'ay.

<sup>7</sup> Ia ty lahin-defoñe miato amy vara'ey hihotakotake? Ia ty mambole valobokey tsy mikama amo voa'eo? Ia ty mpiarake tsy mandriotse amy lia-raikey? <sup>8</sup> Mivolañe ami'ty haondatiko raho, fa toe tsarae' i Hake, <sup>9</sup> ie pinatetse amy Hà' i Mosèy ao ty hoe:

Ko mameo ty añombe mandisam-bare. \*

O añombeo hao o ambenan' Añahareo? <sup>10</sup> Ke itika i nitsarae'ey? Eka! pinate'e ho an-tikañe, soa te hiava am-pitamàñe ty mpiava, naho hitamà ty anjara'e i mpitatakey. <sup>11</sup> Aa naho añ' arofo ty nitongisa'ay ama' areo, ho raha jabajaba hao ty hanifoa'ay ty ho paia' ty sandriñe? <sup>12</sup> Aa naho aman-dily hitake ama' areo ty ila'e, tsy sandrake zahay? Fe tsy rinambe'ay i lily zay, fa mifeake amy ze he'e, tsy mone ho sebañe'ay ty talili-soa' i Norizañey.

<sup>13</sup> Tsy fohi' areo hao te mikama amo mahakama' i anjombaio o mpitoroñe amy Masiñeio, naho mitraok-anjara amy kitreliy o mpiatrake i kitreliio? <sup>14</sup> Natoro' i TALÈ ka te ho veloñe amy talili-soay ty mitaroñe i talili-soay. <sup>15</sup> Fe tsy nirambesako; toe tsy t'ie handrambe izay ty nanokirako, eka hàmake t'ie hikenkañe

---

\* 9:9 Its 25:4

ta te ho koaheñe o fisengeakoo. <sup>16</sup> Ie taroñeko i talili-soay, tsy eo ty isengeako, amy te nafantoke; eka, hankañe amako naho tsy taroñeko i talili-soay. <sup>17</sup> Naho satriko i fitoloñañey le ho tambezeñe; fe ndra tsy satriko, tsy mete tsy anoeko avao fa nafantoke amako i fitoroñañey. <sup>18</sup> Inoñe arè ty tambeko? Te, ie taroñeko i talili-soay, ro atoloko tsi-am-bili'e, soa tsy handrambesako zo amy talili-soay.

<sup>19</sup> Aa ndra t'ie votsotse am' iabikey, niondevo am' ie iabiy, hahareketse ty maro; <sup>20</sup> Tamo Jiosio raho, nanao hoe Jiosy, hahareketse Jiosy; ie ami'ty ambane' Hake le anoeko hoe ambane' Hake, ndra te tsy ambane' Hake, hahareketse ze ambane' Hake; <sup>21</sup> ami'ty tsy aman-Kake ro anoako hoe tsy aman-Kake, (toe tsy afake amy Han' Añaharey raho kanao ambane' o Hà' i Norizañeio) soa te ho azoko ze tsy aman-Kake; <sup>22</sup> amo maifoifoo raho manao maifoifo, handreketse o maifoifoo. Fonga tsikombèko amy ze lafi'e iaby, hahareketse ty ila'e amo sata'e iabio. <sup>23</sup> Anoeko ty amy talili-soay, ho mpitraok' amy voka'ey.

<sup>24</sup> Tsy fohi' areo hao te songa milay o mpanao tsikaviaviao, fe raika avao ty mandrambe tambe? Milaïsa arè hahagioka. <sup>25</sup> Toe milie-batañe amy ze he'e ty te hahimbañe amo fifandreke-tañeo. Anoe' iereo ty handrambesañe sabakan-dreng ho lo, fa itikañe ka, i tsy ho momokey. <sup>26</sup> Aa le milay raho, tsy t'ie hañeañe tsy amantalifireñe; mikomondro, fe tsy t'ie mpamofotioke. <sup>27</sup> Ampivohoreko ty sandriko vaho onde-

vozeko, soa t'ie mitaroñe ami'ty ila'e ro tsy haito.

## 10

### *Hatahata ami'ty Talily Taolo' Israeley*

<sup>1</sup> Tsy teako hamoea' areo, ry longo, ie songa tambane' i rahoñey naho sindre niranga i riakey o roaen-tikañeo, <sup>2</sup> naho fonga nalipotse amy Mosè ao amy rahoñey naho amy riakey, <sup>3</sup> songa nikama i hanen' arofoy, <sup>4</sup> sindre ninoñe amy ranon' arofoy; ninoma' iareo i vaton' arofo nañorikey. Toe i Norizañey i vatoy. <sup>5</sup> Fe tsy ninon' Añahare ty hamaroa'e, vaho binaibai'e an-dratraratra aña. <sup>6</sup> Ie fandrazañañe amantika, te tsy hañiry hatsivokarañe manahake o hadrao' iareoo. <sup>7</sup> Le tsy hiato am-pahasive manahake ty ila'e. Hoe ty pinatetse:

Niambesatse ondatio  
nikama naho ninoñe,  
vaho niongake hihisa.\*

<sup>8</sup> Asoao tika tsy hañarapilo manahake ty nanoe' ty ila' iereo vaho ro'ale-tsi-telo-arivo ty nizamañe ami'ty andro raike. <sup>9</sup> Asoao ka tika tsy hitsoke i TALÈ, manahake ty nitsoha' iareo vaho nampihomaha' o mereño. <sup>10</sup> Le ko miñoñoñoñe manahake ty nanoe' ty ila'e vaho rinotsa' i mpandrotsakey. <sup>11</sup> Toe nanoeñe ho fandrazañañe i nifetsake am'iereo rezay vaho sinokitse hañòke antika nitsatoha' o sa honka'e zao. <sup>12</sup> Aa le mitaoà ry manao te mijohañe, tsy mone hikorovoke.

---

\* **10:7** Avo 32:6

<sup>13</sup> Tsy nifetsaham-panjizianē ila' ze mahazatse ondatio nahareo; migahiñe t'i Andrianañahare, tsy hapò'e ho zizieñe mandikoatse ze lefe, fa mindre amy fanjizianey ro hitolora'e ty hihaha' areo, hahafifeake.

*Ty Bodomom-pahasive ke ty Sabadidak' i TALE*

<sup>14</sup> Ie amy zay ry longo, ibolitiro ty fahasive. <sup>15</sup> Milañone hoe am' ondaty mahihitse raho: niniho o entako zao. <sup>16</sup> Tsy fitraofañe amy lio' i Norizañey hao i fitovim-pañandriañane andriañen-tikañey? tsy fitraofañe amy fañova' i Norizañey hao i mofa folahen-tikañey? <sup>17</sup> Amy te itika maro ro vonga-mofa raike, naho fañova raike, fa songa ifahana' i vonga raikey. <sup>18</sup> Oniño t'Israele ty amo nofotseo: tsy mpitraoke amy kitreliy hao o mikama o nisoroñañeo?

<sup>19</sup> Ino ty teako ho volañeñe: Amam-bente'e hao o fahasiveo, manjofake hao o raha soroñañe amo samposampon-draha? <sup>20</sup> Inao o entakoo: ty fisoroña' o kilakila' ondatio ro isoroñañe aman-kokolampa fa tsy aman' Añahare,† vaho tsy teako t'ie hitraok' amo kokolampao. <sup>21</sup> Tsy aharo finomañe ty fitovi' i TALE naho ty korobon-kokolampa; tsy atraoke amy fandambaña' i Talèy ty tihin-kokolampa. <sup>22</sup> Mampamarahy i TALE hao tika? Maozatse te ama'e hao tika?

*Ty Fidada' o Mpiatoo*

<sup>23</sup> Sindre azo anoeñe, fa tsy songa mahasoa; sambe mete, fe tsy hene mampitombo. <sup>24</sup> Asoao tsy ho eo ty hipay hampiraorao ty vata'e, fa ty

† **10:20** Sor 17:7, Its 32:17

ila'e. <sup>25</sup> Kamao ze aletake an-tsenanao fa ko añontaneaño, hampimarimarihaño ty arofo.

<sup>26</sup> A i TALÈ ty tane toy naho ze halifora'e.‡

<sup>27</sup> Ihe ambara' ty tsi-miato, naho no'o ty homb' ama'e ao, le ikamo ze azotso'e, fe ty amo hamari-marihaño, ko mañontane. <sup>28</sup> Aa naho eo ty manao ama'o ty hoe: Nisoroñaño am-pahasive 'n-itoy, le ko ikama'o kanao nisaontsia'e, naho ty amy fitsakoreaño. <sup>29</sup> Fitsakoreaño, hoe raho, tsy ty azo fa i azey. Fa ino ty izaka' ty ereñerentro' ondatio ty fidadàko? <sup>30</sup> Aa naho ikamako am-pañandriañaño le ino ty ifosàñ' ahy amy nañandriañakoy?

<sup>31</sup> Aa ke mikama he minoño, hera inoñ' inoño ty anoe' areo, hene anò handrengeaño an' Andrianañahare. <sup>32</sup> Ko mampitorifike o Jiosio ndra o Grikao, ndra i Fivorin' Añaharey, <sup>33</sup> hambaño ami'ty ampifaleko ze fonga ondaty amy ze raha iaby, ty tsy ipaiako tombo'e ho ahy, fa ho a i m'aro, soa t'ie ho rombaheño. <sup>34</sup> Tsikombeo raho hambaño amy te zaho ka ro mpiamy Norizaño.

## 11

### *Ty Sata Mañeva o Fitalahoño*

<sup>1 2</sup> Ty andrengako anahareo ry longo, le t'ie mahatiahy ahy amy ze he'e, naho tambozore' areo o nafèn-droaero, ami'ty do'e nitaroñaño. <sup>3</sup> Fa teako ho fohi' areo te lohà' ze hene

---

‡ **10:26** Sab 24:1, 50:12

‘ndaty i Norizañey\*, le lohà’ ty rakemba ty lahilahy; le lohà’ i Norizañey t’i Andrianañahare†. <sup>4</sup> Toe manalatse ty añambone’e ze lahilahy mikolopoke naho mihalaly ndra mitoky. <sup>5</sup> Fa manalatse ty añambone’e ka ze rakemba tsy mampikolopoke ty añambone’e t’ie miloloke ndra mitoky—fa hambañe amy te niharatse. <sup>6</sup> Aa naho tsy mete mikolopo-doha ty rakemba, le hamake te hiharatse. Fe naho mahasalatse i rakembay te ho harateñe ndra hitsifañe le soa re te hikolopo-doha‡. <sup>7</sup> Tsy kolopofa’ ty lahilahy ka ty añambone’e, amy t’ie ty vintan’ Añahare naho ty enge’e; le ty rakemba ro engen-dahilahy. <sup>8</sup> (Toe tsy niboak’ami’ty rakemba ty lahilahy, fa ami’ty lahilahy ty rakemba.) <sup>9</sup> Eka, tsy nitsenēne ho a ty rakemba ty lahilahy, fa ty rakemba ho a ty lahilahy. <sup>10</sup> Ty amy tsraeñey le soa re te añambone’ i rakemba ty viloñe t’ie aman-dily, ty amo anjelio. <sup>11</sup> Ie amy zao, amy Talè ao, le tsy mifampiria ami’ty lahilahy ty rakemba, vaho tsy mihaha ami’ty rakemba ty lahilahy. <sup>12</sup> Le hambañe amy te boak’ami’ty lahilahy ty rakemba te añamy rakemba ka o lahilahio; vaho kila boak’ aman’ Añahare. <sup>13</sup> Mifañaraharà: Mañeva ty rakemba hao ty miloloke aman’ Añahare tsy mikolopoke? <sup>14</sup> Aa tsy anare’ o sata’ ty tane toio hao te manalatse o lahilahio ty maròy lava? <sup>15</sup> Fe naho apò’ ty rakemba ho lava ty maroi’e, le enge’e; amy te nitoloreñe aze ho fandrakofañe o maroi’eo. <sup>16</sup> Aa naho eo ty te handietse, tsy aman-dilitse

\* **11:3** Efe 1:22, 4:15, 5:23 † **11:3** Fot 3:16, Ko I 3:23, Jao 14:28

‡ **11:6** Vol 5:18

ila'e tika ndra o Fivorin' Añahareo.

*Bodomomoke Mahamomoke*

<sup>17</sup> Fe amo taroñeñe zao, tsy rengeko nahareo; ie tsy mifanontoñe ho ami'ty hasoa, fa ho ami'ty haraty. <sup>18</sup> Valoha'e, naho mifanontoñe ho Fivory, inao t'ie mifampiriaria, fe mete hiantofako. <sup>19</sup> (Toe tsy mahay tsy ama' areo avao ty fifampitolahañe hampidodeañe o niventèñe ama' areoo.)

<sup>20</sup> F'ie mifanontoñe, toe tsy ty hikama i sabadidak' i Talèy, <sup>21</sup> fa mikama, songa mandrambe ty mahakama'e heike; le ao ty kerè vaho ao ty jike. <sup>22</sup> Hete! Tsy songa manañe anjomba hao hikamà'e naho hinoma'e? Ke rabioñe' areo ty Fivorin' Añahare, naho salare' areo o rarakeo? Aa ino ty hitaroñako? Ho rengèko amy zay hao nahareo? Tsy hirengèako!

*Ty Sabadidak'i TALÈ*

<sup>23</sup> Fa rinambeko amy TALÈ, i nitaroñakoy, te nandrambe mofo t'i TALÈ IESOÀ amy haleñe nifoterañe azey; <sup>24</sup> nañandriañe re le finola'e vaho nanao ty hoe: Intoy ty sandriko ho anahareo, anò zao ho fitiahiañe ahy. <sup>25</sup> Hambañ' amy zay, rinambe'e i fitoviy, ie fa nikama, le nanao ty hoe: Fañina vao ami'ty lioko ty fitovy toy. Anò zao amy fikama' areo aze ho fitiahiañe ahiko. <sup>26</sup> Aa le amy ikama' areo ty mofo toy naho inomañe ty fitovy toy, ro mitaroñe ty havilasi' i TALÈ ampara' ty fitotsaha'e.

<sup>27</sup> Aa ndra ia ia mikama amy mofoy ndra minoñe amy fitovi' i Talèy ami'ty tsy fañeva'e, le aman-kakeo ami'ty fañova naho ami'ty lio' i

TALÈ. <sup>28</sup> Aa le tsy mete tsy hitso-batañe heike ondatio vaho hikama amy mofoy naho hinoñe amy fitoviy. <sup>29</sup> Amy t'ie mikama naho minoñe ro mikama naho minoñe fàtse ami'ty vata'e naho ie tsy maharedreke i fañovay. <sup>30</sup> Zay ty mampaifoifo naho mahasiloke maro ama'areo, mbore nampiròtse ty ila'e. <sup>31</sup> Ie mahafitsò-batañe ami'ty hatò tika le tsy ho zakaèñe. <sup>32</sup> F'ie zakaèñe, lilove' i TALÈ tsy mone hatrao-pàtse ami'ty voatse toy. <sup>33</sup> Ie amy zao, ry longo naho mifanontoñe hikama, mifandiñisa. <sup>34</sup> Naho eo ty saliko, soa re te hikama añ'anjomba'e aña, tsy mone hivory hafàtse. Halahareko ho anahareo ami'ty fiàviko o raha ila'eo.

## 12

### *o Falalàn-Trokeo*

<sup>1</sup> Ty amo falalàn' arofoo, ry longo, tsy teako hamoea' areo. <sup>2</sup> Fohi' areo t'ie mbe nifehèa' ty voatse toy\*, le nampandriheñe mb'amo raha fahasive moañeo, toe niko-zozoteñe mb'eo. <sup>3</sup> Aa le ampahafohineko, te tsy ia ty ampivolañe' i Arofon' Añaharey ty hoe: Afàtse t'Iesoà, vaho tsy eo ty mahafisaontsy ty hoe: IESOÀ ro TALÈ, naho tsy i Arofo Masiñey.

<sup>4</sup> Miambakambake o falalàñeo, fe raike i Arofoy. <sup>5</sup> Mizarazara o fitoroñañeo, fe raike t'i TALÈ. <sup>6</sup> Ankafankafa o tolon-draha'o fe raike t'i Andrianañahare mifanehake ami'ty halifora' ze he'e, vaho <sup>7</sup> songa anolora'e vintañe raike boak' amy Arofoy ho fañasoàñe i màroy; <sup>8</sup> anolora'e

\* **12:2** Efe 2:11, 4:17, Pe I 4:3, Te I 4:5



tsaran-kihitse amy Arofoy ty raïke, le tsaran-kaharendrehañe amy Arofoy ty ìla'e, <sup>9</sup> le fakisañe amy Arofoy ty ìla'e, naho falalàm-pampijangañe amy Arofoy avao ty ìla'e <sup>10</sup> naho fanoan-draha-tsitantane ty ìla'e naho fitokiañe ty ìla'e naho fahatsikaritam-pañahy ty ìla'e naho fisaontsy-ankafankafa ty ìla'e vaho fandikañe fisaontsy ty ìla'e. <sup>11</sup> Fe Arofo raïke ty manao i hene rezay, songa andiva'e ze satrie'e.

### *Foto'e Raïke, Singa'e Maro*

<sup>12</sup> Aa le hambañe amy te raïke ty sandriñe fe maro o fangefange'eo, le ndra te maro o fangefange'eo, toe sandriñe raïke, manahake zay i Norizañey. <sup>13</sup> Toe ami'ty Arofo raïke tika ro songa nalipotse amy fañòvay ao—ke Jiosy he Grika, ke ondevo he midada—sindre nampinomeñe amy Arofoy.

<sup>14</sup> Toe tsy raïke o fangefange an-tsandriñeo fa maro. <sup>15</sup> Aa naho nanao ty hoe ty fandia: Kanao tsy fitàn-draho, tsy mpiamy fañòvay. Tsy manebañe aze tsy ho mpitraoke amy sandriñey zay. <sup>16</sup> Le ie manao ty hoe ty ravembia: Kanao tsy fihaino raho, tsy mpiamy fañòvay. Tsy mikalañe aze tsy ho mpitraoke amy sandriñey zay. <sup>17</sup> Naho ni-fihaino iaby i fañòvay, aia ty hijanjiña'e? Naho ni-fijanjiñañe iaby, aia ty hiantsona'e? <sup>18</sup> Ie amy zao, songa nalahan' Añahare amy satri'e'y o mpitraok' amy fañòvaio. <sup>19</sup> Aa naho sindre raha raïke avao o fangefangeo, ino ty maha sandriñe aze? <sup>20</sup> Ie amy zao, maro o fangefangeo fe raïke ty sandriñe.

<sup>21</sup> Tsy mahavolañe ty hoe ami'ty fita'ne ty fi-haino: Tsy paiako rehe; ndra ty añambone amo fandiao ty hoe: Tsy ipaiako. <sup>22</sup> Fe o mpitrao-tsandri'ne atao malemeio ro toe pai'ne. <sup>23</sup> Mbore onjonon-tika o amy sandri'ne ataontika ho ambane loh'ne, naho ampihaminen-tika'ne enge'ne o fangefange tsy senge'neo, <sup>24</sup> f'ie tsy paia' o fangefange mahaboleakeo, fa rinajin' Añahare ho raika i fa'ovay vaho tinolo'e asi'ne ambone o fangefange tsy aman' asi'neo, <sup>25</sup> soa tsy hifañambakambake i fa'ovay, fa hene hifampiatrake mira o fangefangeo. <sup>26</sup> Aa ie misotry ty fange'e raika, mindre miore ama'e o fangefangeo; ie asi'ne'ne ty fange'e, le miharo firebeke ama'e o fangefangeo.

<sup>27</sup> Toe fa'ova' i Noriza'ney nahareo, songa fangefange ama'e. <sup>28</sup> Le nitendrèn' Añahare amy Fivoriy ho valoha'e o Firàhe'neo; faharoe o mpitokio, fahatelo o mpañokeo, le o raha-tsitantaneo, le o falalàm-panah'ne, o fa'imb'ne, o fifehea'ne vaho o saontsy ankafankafao.

<sup>29</sup> Songa Firàhe'ne hao? Sindre mpitoky hao? hene mpañoke hao? Sindre mpanao raha tsitantane hao? <sup>30</sup> Fonga amam-palalàm-panah'ne hao? Sindre misaontsy am-pameleke hao? Hene mpandika hao? <sup>31</sup> Fe imaneio o falal'ne amboneio vaho mbe hitoroako ty sata fanjaka.

## 13

*O Fikoko'ne*

<sup>1</sup> Ie mirehake am-pamele' ondaty naho anjely raho fe tsy amam-pikokoañe le feon-torisike mikontsiañe naho fikatsakatsañan-kantsañe avao. <sup>2</sup> Ie mahafitoky naho maharendreke ze hene mietake naho ze atao hilala vaho lifopatokisañe mahaveve vohitse fe tsy aman-koko, le kafoake. <sup>3</sup> Naho koàheko o varakoo hamahànako o rarakeo mbore afoeko ho foreheteñe ty sandriko, f'ie tsy aman-koko, le tsy mahasoahy.

<sup>4</sup> Mahaliñe ty koko naho matarike, tsy mamarahy ty koko, tsy miebotsebotse ty koko vaho tsy mirengevoke; <sup>5</sup> tsy mijaranjarañe, tsy mipay ty aze, tsy mora boseke, tsy mitorifike; <sup>6</sup> tsy ifalea'e ty hatsivokarañe, fe irebeha'e ty hatò; <sup>7</sup> Hene vavè'e, fonga iantofa'e, songa tamàe'e, sindre ifeaha'e.

<sup>8</sup> Tsy milesa ty koko; fe hihelañe ty fitokiañe, le hijihetse ty filikolikoañe, vaho hasaok' aña ty hilala. <sup>9</sup> Mahafohiñe ty ila'e tika vaho mitoky ty pila'e. <sup>10</sup> F'ie miboak' eo ty fonitse, le himosaoña aña o am-paha'eo. <sup>11</sup> Ie niajaja raho, nirehake hoe ajaja, nandrèndreke hoe ajaja, nitsakore hoe ajaja; zaho bey le nadòko o hajajàña. <sup>12</sup> Henaneo mahaisake hoe an-ketsoro malompolompo; ie aña, hifampiatre-daharaña. Maharendreke ty ila'e raho henaneo, f'ie aña ro hahafohiña hambaña amy te arofoanaña.

<sup>13</sup> Sehanga'e henaneo, ty fatokisaña, ty fitamàña, ty fikokoaña, i telo rezay; fe lohà'e ty fikokoaña.

### *Hitoky he Hilikokilo*

<sup>1</sup> Imaneo fikoko; le salalao o añ' arofoo, àntsake ty fitokiañe. <sup>2</sup> Amy te tsy misaontsy ama' ondaty ty milikoliko fa aman' Añahare, le tsy fohi' ondaty; amy te an-tro'e ty isaontsia'e raha mietake. <sup>3</sup> Fe misaontsy am' ondatio ty mpitoky, mampiraorao, mañosike vaho mampanintsiñe. <sup>4</sup> Mañasoa ty vata'e ty milikoliko, fe mañonjoñe i Fivoriy ty mpitoky. <sup>5</sup> Niteako te songa nilikoliko, fe kitrako t'ie mitoky. Losore' ty mpitoky ty mpilikoliko tsy mampibejañe hañasoa i Fivoriy. <sup>6</sup> Ie amy zao ry longo, naho pok' ama' areo ao raho milikoliko, ino ty hañasoa anahareo naho tsy itaroñako famentabentarañe, ndra hilala, ndra fitokiañe, ndra fañòhañe?

<sup>7</sup> Fa ndra o raha tsy veloñe mañaka-peoo, he soly ke marovany, naho tsy miambakambake o feo'eo, aia ty haharendrehañe ty anoe' i soliy ndra i marovaniy? <sup>8</sup> Ie popoe' i antsivay ty feo tsy fohiñe, ia ty hihentseñ' aly. <sup>9</sup> Inahareo ka, naho tsy ampivolañem-pameleke ty saontsy malange, aia ty aharendrehañe i tsaraeñey? amy t'ie hisaontsy an-tioke. <sup>10</sup> Va'e tsifotofoto ty karazantsaontsy ami'ty voatse toy, leo raike ty tsy amandika'e. <sup>11</sup> Fe naho nofiko ty dika' i saontsiy le alike amako i misaontsiy, le ho alike amy misaontsy ka raho. <sup>12</sup> Inahareo ka, kanao sinda hanam-palalàn' arofo, imaneo ty hampiraorao i Fivoriy. <sup>13</sup> Le soa re te ihalalia' i milikolikoy t'ie hahafandika. <sup>14</sup> Amy t'ie miloloke am-pameleke hafa, miloloke ty troko, fe tsy mamokatse ty fitsakoreako. <sup>15</sup> Inoñe aré? Toe hihalaly an-troko

naho hihalaly am-pitsakoreañe, hisabo an-troko vaho hisabo am-betsevetse. <sup>16</sup> Naho tsy zay, ie mitata an-trok'ao avao, aia ty hanoe' i tsy niokey ty hoe: Ie zay! amy fañandriaña'oy kanao nofi'e i saontsi'oy. <sup>17</sup> Ndra te soa i fañandriaña'oy, tsy nahaso a ty ila'e. <sup>18</sup> Andriañeko t'i Andrianañahare te hene ilikoarako likoliko; <sup>19</sup> f'ie ampivory ao, hamake te minday saontsy lime ampitsakoreañe, hañòhako o ila'eo, ta te milikoliko an-tsara rai-ale.

<sup>20</sup> O ry longo, ko miha-ajaja am-betsevetse; eka, manoa hoe ajaja-kede am-palaiñaña, fe miañoña an-kihitse. <sup>21</sup> Pinatetse amy Hake ao ty hoe:

Am-pameleke ankafankafa naho am-pivimbin' ambahiny  
 ty hitaroñako am'ondaty retiañe;  
 fe ndra te zay, mbe tsy hitsendren' ahy iereo, hoe t'i TALÈ.\*

<sup>22</sup> Aa le nanoen-ko viloñe o likolikoo; tsy ho a o mpiatoo fa ho a o tsi-miantokey; vaho tsy nanoeñe ho a o tsy miantokey ty fitokiañe fa ho a o miatoo. <sup>23</sup> Naho tsy zay, ie songa mifanontoñe ty Fivory, naho sindre milikoliko, vaho ie mizilike ao ty tsy mahafohiñe ndra o tsi-miantokey, tsy hanoa'e t'ie gegegege hao? <sup>24</sup> Fe naho hene mitoky, le ie mizilike ao ty tsi-miantoke ndra ty bahimo, songa hampiantok' aze, sindre hampamotopotots' aze <sup>25</sup> amy te naborake o mietake an-tro'eo; le hibabokey andahara'e eo re hitalaho aman' Añahare vaho

\* **14:21** Ies 28:11,12

hitaroñe ty hoe: Toe ama' areo etoa t'i Andrianañahare!

*Fitalahoañe Mañeva*

<sup>26</sup> Akore amy zao ry longo? ie mifanon-tonē, songa manaña sabo naho lañonañe naho famentabentarañe, naho likoliko miharo fandikañe, vaho hene hanoēne ho fampirao-raoñe. <sup>27</sup> Naho eo ty milikoliko he roe, tsy mandikoatse telo, le ifandimbezañe, vaho tsy mete tsy am-pandika. <sup>28</sup> F'ie naho po-pandika, le hianjiñe te am-Pivory ao, fa añ'arof'o'e naho aman' Añahare ty hitangongoa'e. <sup>29</sup> Ampilañono ty mpitoky telo ndra roe, le handanjalanja o ila'eo. <sup>30</sup> Ie entoeñe ka ty miambesatse, le hianjiñe ka i valoha'ey. <sup>31</sup> Hene mahazo mitoky ampifandimbezeñe, soa te sindre hianatse, songa hosiheñe. <sup>32</sup> Ie amy zao iambanea' ty arofo'e ty mpitoky. <sup>33</sup> Amy te tsy fifandrakarakañe t'i Andrianañahare fa fanintsiñañe. Hambañe amo fivori' o noro'eo iabio, <sup>34</sup> le hitam-pianjiñañe am-Pivory o rakembao, tsy apoke hisaontsy fa hiambane, ty amy pinatetse amy Hake ao†. <sup>35</sup> Naho te hañontane iereo, le songa hañontane ty vali'e añ'anjomba'e ao; fa mahasalatse naho misaontsy am-Pivory ao ty rakemba. <sup>36</sup> Hete! Niboak' ama' areo hao i tsaran' Añaharey? Hera, inahareo avao ty nivotraha'e?

<sup>37</sup> Naho eo ty mieva ho mpitoky, ndra aman' arofo, soa re te hahatsikarake te lili' i TALÈ o sokirekoo. <sup>38</sup> Aa naho eo ty tsy maharendreke, apoho re tsy hahafohine. <sup>39</sup> Ie amy zao ry

---

† 14:34 Fot 3:16

longo milozoha fitokiañe vaho ko rarà' areo ty milikoliko; <sup>40</sup> fa hene anòeñe ami'ty fañeva'e naho am-pahendreañe.

## 15

### *Ty Fivañonan-ko velo'i Norizañey*

<sup>1</sup> Te hampandreke anahareo henaneo, ry longo, i talili-soa nitaroñakoy, i rinambe areoy naho ijohaña' areoy; <sup>2</sup> i entañe nitaroñakoy le maharombake te vontitireñe, tsy mone tsy vente'e i natokisa' areoy.

<sup>3</sup> Fa nitaroñeko ama' areo ty lohà' i rinambekoy, te nivilasy ho a' o hakeon-tikañeo i Norizañey ty amo Sokitse Masiñeo, <sup>4</sup> le nalen-teke vaho natroatse amy andro faha-teloy ty amo Sokitse Masiñeo, <sup>5</sup> le nisodehañe amy Kefasy vaho amy folo-ro'amby rey. <sup>6</sup> Ie aña, le niboak' aman-drolongo mandikoatse ty liman-jato; mbe veloñe ty hamaroa'e henaneo, fe miròtse ka ty ila'e. <sup>7</sup> Le nipoteake am' Iakobe re naho amo Firàheñe iabio, <sup>8</sup> fara'e nisodehañe amako, zaho hoe ajaja tsy añaom-bolaña; <sup>9</sup> toe tsitso' o Firàheñe iabio vaho tsy mañeva hatao Firàheñe, amy te nisamporeraheko i Fivorin' Añaharey. <sup>10</sup> Fe i fatarihan' Añaharey ty maha zao ahy; naho tsy nizoeña ho kòake i falalà'e amakoy, fa nitromake mandikoatse iereo iaby; toe tsy zaho, fa ty hasoan' Añahare amako. <sup>11</sup> Aa ke zaho he iereo, nitaroña zahay vaho niantoke nahareo.

### *O Fivañonan-ko Veloña*

<sup>12</sup> Aa naho tseizeña te nitroatse amy havilasiy i Norizañey, akore te manao ty hoe ty ila'e

ama' areo, te, Tsy eo ze o fivañona' o vilasio zao? <sup>13</sup> Fe naho tsy ampitroareñe o havilasio, le tsy nitroatse ka i Norizañey. <sup>14</sup> Aa naho tsy natroatse i Norizañey, le tsy jefa'e o fitaroña'aio vaho kòake ty fatokisa' areo, <sup>15</sup> mbore zoeñe t'ie valolombelom-bande aman' Añahare, amy te nitaroñe'ay ty aman' Añahare te natroa'e i Norizañey, fe inao tsy natroa'e—ze ho nito naho tsy mivañom-beloñe o vilasio. <sup>16</sup> Aa naho tsy mitroatse o fañòvao, le tsy natroatse ka i Norizañey. <sup>17</sup> Aa naho tsy natroatse i Norizañey le tsi-vara ty fatokisa' areo, fa mbe amo hakeo' areo <sup>18</sup> vaho fa momoke ka o miròtse amy Norizañeio. <sup>19</sup> Aa naho ty haveloñe toy avao ty itamantika i Norizañey, le amy ze hene ondaty itika ro lombolombo' ty mahaferenay.

<sup>20</sup> Fe toe natroatse amy havilasiy i Norizañey, i loha-voa' o mirotseoy. <sup>21</sup> Aa kanao añama' t'indaty o havilasio, le añama' t'indaty ka ty fivañona' o vilasio. <sup>22</sup> Fa hambañe amy te kila vilasy amy Dame ao, te hene ho velomeñe amy Norizañey, <sup>23</sup> f'ie songa ami'ty filaha'e: i Norizañey ro sese-lengo'e, mandimbe aze o amy Norizañeio amy fitotsaha'ey, <sup>24</sup> vaho ho tondroke i figadoñañey, ie atolo'e aman' Añahare Rae i fifeheañey, naho fa rinotsa'e ze fonga fandiliañe naho fifelehañe vaho faozarañe. <sup>25</sup> Amy te tsy mahay tsy hifehe ampara' te fonga napoke ambane' o fandia'eo o rafelahi'eo.\* <sup>26</sup> I havilasiy ro rafelahy sehanga'e ho rotsaheñe. <sup>27</sup> Ie kila nampiambanè'e am-pandia'e ao. Aa ie manao

---

\* 15:25 Sab 110:1



ty hoe:

kila nampiambanè'e am-pandia'e ao,†

le malange te tsy añate'e i nampidoñe ze he'e ambane'ey. <sup>28</sup> Ie kila nampiambanè'ne ama'e, le i Anakey ro hiandaly amy Nampiambane ze he'e ama'ey, soa te ho andindimone' ze halifora'e t'i Andrianañahare.

<sup>29</sup> Aa naho tsy zay, ino ty hanoe' o nilipotse ty amo nivilasio? Naho tsy mitroatse ka o nivilasio, ino ty ilipora' iareo? <sup>30</sup> Akore ka ty fiatrefa'ay feh' ohatse lomoñandro? <sup>31</sup> Eka, ry longo, ventèko amy fisengeako amy Talèntika IESOÀ Norizañey, t'ie mikenkañe boak' andro. <sup>32</sup> Aa naho fisalala' ondaty ty nifandrakaraheko o biby hako e Efesosy aña le ino ty nitombo'e amako? Naho tsy mivañoñe o vilasio, te mone: Antao hikama naho hinoñe, fa hikoromake te hamaray.‡

<sup>33</sup> Asoao tsy ho fañahieñe: Toe mañamavo havañoñañe ty fosoñan-draty. <sup>34</sup> Mihendrea ami'ty fañeva'e, le ko mandilatse; fa eo ty tsy mahafohiñe an'Andrianañahare. Hanalatse anahareo ty nanoako zay.

### *I Sandry Nampivañoñañey*

<sup>35</sup> He eo ty hanao ty hoe: Akore ty hafitroara' o loloo? naho an-tsandry inoñe ty hivotraha' iareo? <sup>36</sup> Ty minè! Tsy ho veloñe i tongise'oy naho tsy mate heike. <sup>37</sup> Le ihe mitongy, tsy i ho vente'ey i tongise'oy, fa ty tabiry—he ampemba, ke ty ila'e. <sup>38</sup> Fe i Andrianañahare

† 15:27 Sab 8:6 ‡ 15:32 Ies 22:13, 56:12

ty manolotse vatañe ama'e, ze safiri'e, naho amy ze tabiry t'y ho vata'e.

<sup>39</sup> Toe tsy hene hambañe ze atao nofotse; raike ty a ondatio, naho nofotse hafa ty a o bibi-hakoo, naho nofotse ila'e ty a o voroñeo vaho hafa ty a o fiañeo. <sup>40</sup> Ao ka o sandrin-dikerañeo naho o sandri' ty tane toio; raike ty engen-dikerañe vaho hafa ty enge' o an-tane atoio. <sup>41</sup> Raike ty enge' i àndroy le hafa ty enge' i volañey naho hafa ty enge' o vasiañeo vaho mifañambake ty enge' ty vasiañe ami'ty vasiañe.

<sup>42</sup> Zay ka ty fivañona' o vilasio. Ie tinongy ho an-kamomohañe, fe hitroatse tsy ho an-kamomohañe, <sup>43</sup> tinongy ho an-kamavoañe f'ie hatroatse ho aman' engeñe; tinongy ho an-kaifoifoañe fe hatroatse ho aman-kaozarañe, <sup>44</sup> tinongy ho aman-tsandri' ty tane toy f'ie hatroatse ho amam-pañòvan' arofo. Kanao eo ty sandri' ty tane toy, ao ka ty añ' arofo. <sup>45</sup> Hoe ka ty pinatetse:

Nanoeñe arofo veloñe t'i Dame,§

indaty valoha'ey; Arofo mpameloñe ka t'i Dame tsitso'e. <sup>46</sup> Fe tsy i añ' arofoy ty nivaloha'e, fa i an-taney vaho zay i añ' arofoy. <sup>47</sup> Boak' antane ao indaty valoha'ey vaho boak' andindiñe ao indaty faharoey. <sup>48</sup> Manahake i tan-taney o an-taneo vaho hambañe amy an-dikerañey o andindiñeo. <sup>49</sup> Le hanahake ty fisikinan-tika ty vinta' i debokeiy, ty hisikinan-tika i vintan-dikerañey.

<sup>50</sup> Le hoe raho, ry longo, tsy mahalova i Fifehean' Añaharey ty nofotse naho lio vaho

tsy mandova ty tsi-fihomahañe ty fihomahañe.  
<sup>51</sup> Ingo itaroñako razan-drehake: Tsy songa hiròtse tikañe, fa sindre hiova, <sup>52</sup> ami'ty manao zao, ami'ty tsy mahamaiñ'ive, amy feon' antsiva honka'ey. Hipopò i antsivay naho hatroatse tsy ho momoke ka o loloo vaho hiova tikañe. <sup>53</sup> Fa tsy mahay tsy hisikiñe i tsy mihomakey i mihomakey vaho hisikiñe o tsy fikoromahañeo o mete mikoromakeo. <sup>54</sup> Aa ie misikiñe ty tsy mete momoke i mihomakey naho misikiñe o tsi-fikoromahañeo ty mikoromake le ho tendreke i tsaraeñe ty hoe:

Nagodra' ty harebahañe ty havilasy.\* <sup>55</sup> O

Havilasio, aia ty fandrebaha'o?

O Tsikeokeokeo, aia ty finipoha'o? †

<sup>56</sup> Hakeo ro finipoha' o havilasio vaho i Hake ro haozara' o tahiñeo. <sup>57</sup> Fe andriañeñe t'i Andri-anañahare Mpanolotse antika i fandrebahañey añamy Talèntika IESOÀ Norizañey.

<sup>58</sup> Ie amy zao, ry longo sarotse, migahiña, mijadoña; mahimbaña nainai'e amo fitoloña' i TALÈO, fohiñe te tsy kafoake ty fitromahañe amy TALÈ.

## 16

### *Kipopòke ho a Ierosaleme*

<sup>1</sup> Aa ty amy fanontonañe ho amo noro'eoy, manahake i nampanoeko o Fivory e Galateoy ty hanoe' areo: <sup>2</sup> Ie amy loak' andro' i SABOTSEY, le sambe mañajà an-driha ao tandrife' ty vokatse\*

\* **15:54** Ies 25:8 † **15:55** Hos 13:14 \* **16:2** Rom 15:28

nitahiañ' aze, soa tsy anontonañe ka naho avy raho. <sup>3</sup> Ie mipotitse eo raho, ze sitra'areo an-taratasy, ro hahitriko mb'e Ierosaleme aña hinday o natonto' areo an-tsatrin-troo. <sup>4</sup> Aa naho mahasoa ty hombako mb'eo, le hindre lia amako iereo.

### *Fisafiri' i Paoly amy Fañaveloa'ey*

<sup>5</sup> Ho tiliheko nahareo naho fa niranga i Makedonia, fa ho soroheko ty Makedonia; <sup>6</sup> le mete hañialo ama' areo, ke hiasotry ao, hampionjona' areo mb'amy liakoy mb'eo, ndra te homb'aia. <sup>7</sup> Toe tsy te hihelañako tilike ami'ty liako henanekeo, fa itamako ty hitambatse ama' areo ao naho satri' i TALÈ. <sup>8</sup> F'ie hañialo e Efesosy aña hey ampara' i Halimampoloy, <sup>9</sup> amy te misokake ho ahy ty lala mangadagadaña mete mahavokatse, fe maro ty misebaña.

<sup>10</sup> Aa naho pok'eo t'i Timoty, le ampitraofo ao tsy an-tahotse, amy te o tolon-draha' i Talèo ty anoe'e manahake o fanoekoo. <sup>11</sup> Le ko mete'areo sirikaen-dre, fe ampionjono an-kanintsiña, hitotsaha'e amako, fa itama'ay naho o longoo.

<sup>12</sup> Le i Apolosy longontikañey, nimaneko osike ty homba'e mb'ama' areo mb'eo mindre amo ralalahio, fe tsy nisatrie'e hey ty hañavelo. Toe homb'eo re ami'ty mahamete.

### *Figadoña'e*

<sup>13</sup> Mitaòa, mifahara am-patokisaña, mifanehafa hoe fanalalahy vaho maozara. <sup>14</sup> Anò ampikokoaña ze hene toloña' areo.

<sup>15</sup> Miambane ama' areo raho ry longo, (fohi' areo o añ'anjomba' i Stefanasio, ty lohavao' i

Akaia naho nijadoñe ho mpifanehake hitoroñe o noro'eo;) <sup>16</sup> te hiambaneañe o hambañe ama'eo, naho amy ze mpañolotse i fitoloñañey iaby. <sup>17</sup> Mahaehake ahy ty nikoneha' i Stefanasy naho i Fortonato naho i Akaiko, amy t'ie nañeneke ze tsy niampe tama' areo, <sup>18</sup> naho nampazava ty troko naho ty anahareo; aa le onjono ty manahake iareo.

*Fisalamañe Fara'e*

<sup>19</sup> Mañontàne anahareo o Fivory e Asia aña. Salamae' i Akoila naho i Prisilae vaho i Fivory añ'anjomba' iareoy, ami'ty haporean' arofo'e amy TALÈ ao. <sup>20</sup> Añontanea' o longo iabio. Mifanalamà ami'ty oroke miavake. <sup>21</sup> Anoniako an-tañaiko etoañe: לֹב <sup>22</sup> Ee te hafâtse ze tsy mikoko i TALÈ. Mb'etoa ry TALÈ! <sup>23</sup> Ho ama' areo ty hasoa' IESOÀ TALÈ Norizañey. <sup>24</sup> Ama' areo iaby am' IESOÀ Norizañey ty fikokoako. Amena.

**Saontsin' Añahare**  
**The Holy Bible in the Tandroy language of**  
**Madagascar**  
**La Sainte Bible en langue tandroy de Madagascar**

Copyright © 2023 Steve Lellelid

Language: Tandroy (Malagasy, Tandroy-Mahafaly)

**DRAFT VERSION**

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-03

---

PDF generated using Haiola and XeLaTeX on 3 May 2024 from source files dated 3 May 2024

25d648f1-3cb3-5c21-a9e0-49038eca9d1c